

BOSNA I HERCEGOVINA



*Ministarstvo za ljudska prava i izbjeglice
Ministry for human rights and refugees*

Prečišćeni tekst

Memorandum
o razumijevanju i saradnji na elektrifikaciji lokacija/objekata
realizovanog povratka

BUDUĆI DA JE Vijeće ministara BiH, uvažavajući veoma teško i neodrživo stanje po pitanju pristupa povratnika elektromreži, usvojilo zaključke s ciljem da pomogne i podrži napore svih relevantnih subjekata na elektrifikaciji lokacija realizovanog povratka

BUDUĆI DA JE Ministarstvo za ljudska prava i izbjeglice /Ministarstvo/ zaduženo za provedbu zaključaka i izvještavanje Vijeća ministara o realizaciji istih, te da na osnovu zaključaka ima obavezu i želi podstaknuti domaće i strane subjekte na učešće u zajedničkim projektima elektrifikacije

Strane :

Ministarstvo za ljudska prava i izbjeglice BiH
Javno poduzeće Elektroprivreda Bosne i Hercegovine
Elektroprivreda Republike Srpske
Javno poduzeće Elektroprivreda Hrvatske zajednice Herceg Bosne
Ministarstvo za izbjeglice i raseljena lica RS
Federalno ministarstvo raseljenih osoba i izbjeglica
Federalno ministarstvo energije, rudarstva i industrije
Ministarstvo privrede, energetike i razvoja RS
Fond za povratak BiH

Svjedoci :

Ured Visokog predstavnika za Bosnu i Hercegovinu / OHR /
Organizacija za sigurnost i saradnju u Evropi / OSCE /
Visoki komesarijat za izbjeglice Ujedinjenih naroda / UNHCR /

sklapaju ovaj Memorandum u duhu partnerstva i prijateljske saradnje i sporazumijevaju se o slijedećem:

Stanje

Član 1

Strane, potpisnice ovog Memoranduma su saglasne da postoji ozbiljan problem s elektrifikacijom određenih lokaliteta/objekata realizovanog povratka, što ima direktne, negativne posljedice na održivost realizovanog, ali i na planirani povratak.

Svrha

Član 2

U cilju realizovanja prava povratnika na pristup energentu kao javnom dobru, te prevencije ozbiljnih i dalekosežnih negativnih posljedica za povratak, strane potpisnice se slažu da će problem elektrifikacije identifikovanih lokaliteta/objekata realizovanog povratka, nastojati riješiti u naredne 3 godine.

Nosioci aktivnosti na lokalnom nivou

Član 3

Strane potpisnice su se saglasile da će nosioci aktivnosti na elektrifikaciji lokacija/objekata realizovanog povratka, na lokalnom nivou biti općine.

Identifikacija lokaliteta/objekata

Član 4

(1) Strane potpisnice su saglasne da Ministarstvo za ljudska prava i izbjeglice, putem javnog poziva općinama na nivou BiH /jednom godišnje/, prikupi i prioritizuje projektne prijedloge za elektrifikaciju lokaliteta/objekata realizovanog povratka.

(2) Elektrodistribucije/elektroprivrede će zajedno s općinama, izraditi tehničko-financijski dio projektnog prijedloga iz predhodnog stava, pri čemu će predložiti ono rješenje koje je tehnički korektno i za dati slučaj najekonomičnije.

Participacija

Član 5

(1) Strane potpisnice prihvataju da u naredne 3 godine, počevši od 2008 godine, participiraju u projektima elektrifikacije za identifikovane lokalitete/objekte iz predhodnog člana.

(2) Strane potpisnice će, pored vlastite participacije, nastojati osigurati i participaciju drugih donatora

(3) Strane su suglasne da se financijska participacija institucija BiH, entiteta, općina i donatora, realizuje udruživanjem u Fond za povratak.

(4) Više detalja o načinu, vrsti i obimu participacije iz stava (1), (2) i (3) ovog člana, definirat će se naknadno, odgovarajućim aktima.

Odgovornost

Član 6

Strane potpisnice prihvataju da prvenstvena odgovornost za rekonstrukciju elektrodistributivnih mreža pripada JP Elektroprivreda Bosne i Hercegovine, JP Elektroprivreda Hrvatske zajednice Herceg Bosne i Elektroprivredi Republike Srpske koja su i vlasnici elektrodistributivnih mreža na području njihove odgovornosti.

Vlasništvo doniranog materijala

Član 7

Strane potpisnice su saglasne da je donirani materijal za saniranje elektromreže u svrhu elektrifikacije objekata realizovanog povratka, vlasništvo elektroprivreda/elektrodistribucija.

Obaveze

Član 8

(1) Elektroprivrede/elektrodistribucije će participirati tako da, između ostalog, izrade izvedbenu projektnu dokumentaciju ili neophodnu specifikaciju materijala ili predmjer radova, izvode radove i sva potrebna mjerenja i ispitivanja prije puštanja objekta pod napon, osiguravaju stručni nadzor u toku izvođenja, izvrše priključenje objekta u skladu „Sporazuma o ponovnom priključenju stambenih objekata povratnika na elektrodistributivnu mrežu“.

(2) Ministarstvo vrši monitoring procesa dodjele ugovora izvođaču/dobavljaču od strane općine, u skladu sa Zakonom o javnim nabavkama BiH, uključujući izradu tenderske dokumentacije, raspisivanje javnog natječaja, odabir najpovoljnije ponude, kao i procesa realizovanja kompletnog Ugovora u skladu sa dinamičkim planom. Izvještaji o monitoringu procesa iz predhodnog stava, Ministarstvo će dostaviti Komisiji za izbjeglice i raseljene osobe BiH i Fondu za povratak, naročito vodeći računa o datumu dostave izvještaja koja predhode plaćanju.

(3) Fond za povratak BiH će vršiti plaćanje računa o izvođenju radova odabranim izvođačima, u skladu sa predhodno potpisanim ugovorima, koje je općina angažovala na realizovanju projekata rekonstrukcije. Fond za povratak BiH, kao potpisnik ugovora, zadržava pravo da zatraži i dodatna obrazloženja i dokumentaciju u cilju transparentne finansijske realizacije ugovora.

Prelazne i završne odredbe

Član 9

Potpisivanje i stupanje na snagu ovog Memoranduma ne isključuje primjenu Sporazuma o ponovnom priključenju stambenih objekata povratnika na elektrodistributivnu mrežu

Član 10

Strane su saglasne da nakon potpisivanja Memoranduma, po potrebi i periodično razmjenjuju sve informacije relevantne za realizovanje istog.

Član 11

Memorandum je potpisan u Sarajevu dana _____ 2007 godine, kada i stupa na snagu. Sačinjen je na bosanskom, srpskom, hrvatskom i engleskom jeziku u _____ originala, po dva originala za svaku stranu, pri čemu su svi tekstovi jednako vjerodostojni, što strane i svedoci potvrđuju svojim potpisima.

Strane

1. Ministarstvo za ljudska prava i izbjeglice BiH _____
Dr. Safet Halilović, ministar

2. Javno poduzeće Elektroprivreda Bosne i Hercegovine _____
Gosp. Amer Jerlagić, V.D. generalni direktor

3. Elektroprivreda Republike Srpske _____
_____ generalni direktor